

Z E L A N D I A.

L Euinus Lemnius Zirizæus in libello de occultis naturæ miraculis hæc habet inter alia de suis Zelandis; Regionem hanc maritimam veterib. olim non fuisse incognitam ex Cornelio Tacito colligi potest; non hoc equidem, quo nunc innotescit, nomine; sed ex vsu ac vulgata illa alloquendi consuetudine ac compellatione, qua populares atque indigenæ inter se sunt vsi: itaque MATTIACORVM illos nomine designat, cum inquit: Est in eodem obsequio Mattiacorum gens Batauis similis, nisi quòd ipsi terræ suæ solo acrius animantur. Quo indicat, tametsi Batauis siue Hollandis à cavitare terræ sic denominatis vicini sint ac finitimi, ita vt inter illos referri debeant; vulgari tamen nominis appellatione discretos, atque Oceano propiores, magis feroces esse, vt reuera sunt, ac viribus, ingenio, solertia, versutiis, calliditate, fallaciis, captionibus, negociandi peritia, ac conquirendi industria superiores. Quòd autem Mattiaci nominentur, non à loco, aut Duce aliquo, sed à populari appellatione, atque vsitato loquendi more enatum est, nempe à MAET, quæ vox in quotidiano sermone, ac congressu familiari, omnium apud nos actionum, contractuum, periculorum, ac totius voluntatis, consilij, laboris; socium, comitemque sonat; omniumque rerum quas inter se exercent, participem ac consortem. &c. Nam Zelandiæ nomen recens est, ac veterib. incognitum, à terra ac mari conflatum, quasi dicas, terram ac solum maritimum: mari enim vndique cingitur, multisque Insulis distincta est, nempe quindecim, tametsi paucis abhinc annis magnam cladem huic Regioni Oceanus intulit; cuius sæuitia atque immanitate, magna Zelandiæ pars, diuulsis ac dissipatis funditus aggregibus, salo oppressa est, atque mari æquata: subsistunt tamen insignes aliquot Insulæ, quarum tres præcipuæ cum Oceani æstu continenter luctantur, atque immensis sumptibus, aduersum barbarum hoc atque indomitum elementum ægrè se tuentur. Inter has primum ex alto in portum delatis se offert Walachria, vel ab eius cultore sic denominata, vel vt coniiicio, à Gallis, qui hanc oram frequentabant, qui Belgica voce etiam nunc Walen vocantur; aut ab ea parte Britannia, in qua versus Occidentem consistunt Walli, apud Anglos præcipuæ nobilitatis viri, à Gallis etiam oriumdi, quod idionia eorum adhuc indicat. &c. Hinc Aquilonem versus, aut ab Ortu solstitiali opposita est Scaldia, à præterlabente Scalde flumine sic nominata. &c. Suytbeuelandia, quæ à solo Austro opposito, sic denominata est; spatiosissimo, amœnissimoque versus Flandriæ ac Brabantia oras tractu exporrecta, tametsi paucis abhinc annis maximam iacturam passa, dimidio iam sit angustior. Reliqua lege apud ipsum Auctorem, qui omnes eius Insulas, Oppidaque elegantiss. describit. His, si velis, adiungas Lud. Guicciardinum, & horum absolutam habebis cognitionem. Sed corollarij vice, adde Adriani Barlandi Urbium Germaniæ inferioris descriptiones.

